



TANAH mendap yang membimbangkan penduduk di hadapan sebuah rumah di Kampung Pindah, Kampung Baru, Kuala Lumpur.



SEORANG penduduk menunjukkan sebuah rumah di Kampung Pindah, Kampung Baru, Kuala Lumpur yang retak-ekoran tanah mendap sejak tiga tahun lalu. - UTUSAN/QAMARIUL RIZAL

Tanah mendap: Kerja baik pulih dijangka siap penghujung 2015

JPS cadang bina palung baharu

Oleh MOHAMAD HARITH
MOHAMAD NIZAR
kota@utusangroup.com.my

KUALA LUMPUR 30 Jan. - Kerja-kerja membaiki pulih kawasan Kampung Pindah, Kampung Baru yang dilanda tanah mendap dijangka siap sepenuhnya pada penghujung tahun 2015.

Timbalan Pengarah Bahagian Pengurusan Banjir, Jabatan Pengairan dan Saliran (JPS), Wan Mohd. Sulaiman Wan Ismail berkata, pihaknya dalam proses membuka tender bagi kerja-kerja tersebut.

"Setakat ini, kita sedang merancang reka bentuk baharu untuk sa-



Tanah mendap di Kampung Pindah semakin serius

Rumah retakancam nyawa

KERATAN Utusan Malaysia 24 Januari 2014.

luran air atau palung serta laluan terowong yang kini dilihat menyusahkan penduduk di kawasan itu.

"Kita akan bina laluan baharu yang tidak melibatkan penempatan penduduk bagi menggantikan laluan

sebelum ini yang rosak," katanya kepada *Utusan Malaysia* ketika dihubungi di sini hari ini.

Beliau mengulas laporan *Utusan Malaysia* pada 23 Januari lalu berhubung kejadian tanah mendap

ekoran kerosakan saluran air di bawah tanah di Kampung Pindah yang semakin serius.

Masalah yang berlarutan sejak tiga tahun lalu itu menyebabkan beberapa buah rumah penduduk retak dan hampir runtuh sekali gus memaksa mereka mengosongkan kediaman terbabit.

Dalam pada itu, Wan Mohd. Sulaiman memberitahu, kerja membaiki pulih kawasan itu dijangka bermula pada Julai tahun ini.

"Semasa proses membaiki pulih kawasan itu, penduduk mungkin perlu dipindahkan kerana kami akan menimbus semula laluan saluran air yang lama dan ini mungkin

mengundang risiko kepada keselamatan mereka," katanya.

Sementara itu, Datuk Bandar Kuala Lumpur, Datuk Seri Ahmad Phasal Talib berkata, tanggungjawab membaiki pulih kawasan tersebut dijalankan oleh JPS.

"Kita sudah minta JPS melaksanakan projek tersebut sejak lawatan Timbalan Perdana Menteri, Tan Sri Muhyiddin Yassin di situ kira-kira tiga tahun lalu.

"Dalam perbincangan itu, kita sudah memutuskan untuk memindahkan penduduk ke kawasan yang lebih selamat serta dipindahkan semula setelah projek siap sepenuhnya," katanya.